



Consul Dominicano, sra. Joselyne Rosario Romero

Un plasa na honor di Juan Pablo Duarte

ORANJESTAD – Ayera mainta Consulado di Republica Dominicana a convoca un conferencia di prensa pa anuncia un programa special den cuadro di nan Dia Nacional. Ta asina cu diasabra awor 25 di februari e pueblo Dominicano lo conmemora e di 168 aniversario di e declaracion di nan independencia nacional cu a tuma luga riba nan fecha historico di dia 27 di februari di 1844.

Continuacion pagina A16

Consul Dominicano, sra. Joselyne Rosario Romero

Comunidad Dominicano lo tin un plasa na honor di Juan Pablo Duarte na Aruba

Diasabra awor lo tin acto di ponemento di prome piedra

Consul Dominicano na Aruba, sra. Joselyne Rosario Romero.

Continuacion di pagina A1

Durante e conferencia di prensa Consul Dominicano na Aruba, sra. Joselyne Rosario Romero a informa cu diasabra awor pa 11'or di mainta nan lo tin e acto di ponemento di e prome piedra di un plasa na honor di e Tata di Independencia di Republica Dominicana, Juan Pablo Duarte.

E ceremonia aki lo conta cu presencia di nos autoridatnan local, entre nan nos Prome Minister sr. Mike Eman y Gobernador di Aruba, sr. Fredis Refunjol. Como invitado special lo ta

presente e director di Oficina di Ingeniero y Supervisor di Obra di Estado (OISOE), Ing. Luis Sifres. Igualmente e diplomatico a probecha e oportunidad aki pa formula un invitacion special na e comunidad Dominicana residencia na Aruba pa bin presencia e inicio di e obra aki caminda lo ser instala un busto dedica na e memoria di e fundado di e nacion Dominicano, Juan Pablo Duarte.

E ceremonia aki lo tuma luga den e area unda e plasa lo ser construi, e ta

ubica riba e crusada Leeuwenhoekstraat y Hospitalstraat dilanti di hospital bieu (cerca di La Granja Restaurant).

Den number di e pueblo Dominicano, Consul Rosario Romero a expresa su palabranan di gradicimento na nos autoridatnan local cu a contribui grandemente y facilita e proceso di otorgamento di e tereno publico aki pa asina cuminsa cu e construccion di e plasa menciona cu lo ser batisa como Plasa Juan Pablo Duarte.

El a laga sa cu nan mester a warda pero finalmente e construccion di e plasa lo bira un realidad.

E diplomatico a indica cu segun un registracion cu nan a realisa actualmente 6.500 Dominicano ta bibando na Aruba, y finalmente nan lo tin un busto di Juan Pablo Duarte pa asina celebra nan Dia di Independencia.

E ta un trabou cu lo tarda un luna y mei pa bin cla, si nan no ta confronta ningun contratiempo. Igualmente e Consul Dominicano a laga sa cu no ta trata gewoon di instalacion di e busto so, sino cu e lo bira un obra, kiemen un plasa cu lo embeyece e area importante aki.

"Nos ta bay embeyece e area aki", asina Consul Rosario Romero a bisa. E ta haya cu e sitio unda e plasa lo ser construi ta uno ideal ya cu e ta keda den un area central cu ta accesibel pa tur hende.

Igualmente Consul Rosario Romero ta formula un invitacion general pa tur hende disfruta di un actividad folklorico cultural cu lo tuma luga diasabra awor pa 7'or anochi na Paseo Herencia.

El splica cu e actividad aki lo conta cu un show di un grupo folklorico di e Ministerio di Turismo di su pais. E ta un grupo di 13 integrante cu lo presenta un show di danza di e folklore Dominicano.

"Nos ta folklore, nos ta Bachata, nos ta Merengue", asina e diplomatico a declara dilanti e miembronan di prensa. Tambe el a laga sa cu e mesun anochi ey lo tin presentacion di un grupo local di Bachata conoci como 'Los Iguales' cu lo percura pa crea un ambiente festivo enconexion cu e di 168 aniversario di independencia di Republica Dominicana. □